

АКАФИСТ СВЯТОЙ ПРЕПОДОБНОЙ МАНЕФЕ ГОМЕЛЬСКОЙ

Акафист святой преподобной Манефе Гомельской

Кондак 1

Яко светильница явилася еси всесветлая, добродетелей светлостью озаряеши верных исполнения, всея Гомельския земли молитвенница, хвалебное пение ти приносим, преподобная мати наша Манефо, во всяких бедах и напастех заступай нас, грешных, вопиющих к тебе:

Радуйся, преподобная мати наша Манефо, новая похвало и земли наша утверждение.

Икос 1

Ангельски пожившая на земли и Ангелом равностоятельница явилася еси на небеси, с теми же и неизреченныя оныя наслаждаешися доброты, преподобная мати, помощнице и теплая заступнице наша, восхваляем тя песньми сицевыми:

Радуйся, родителей благочестивых плод целомудренныя чистоты.

Радуйся, славо и заступление граду нашему.

Радуйся, наша земли прозябение святое.

Радуйся, Гомелю похвало.

Радуйся, яко из млада Богу послужила еси.

Радуйся, яко гласу Божию в совести внимавшая.

Радуйся, Царствия Небеснаго наследнице.

Радуйся, вечныя славы сопричастнице.

Радуйся, преподобная мати наша Манефо, новая похвало и земли наша утверждение.

Кондак 2

От юности твоя сосуд избранный себе Богу явила еси, преподобная мати наша Манефо, добрыми твоими деянии: воздержанием, молитвою и милостынею, чистотою душевною и телесною, любовью же и смиренномудрием. Темже Небесному Царю и Владыце всех угодила еси и, пресветлым Небесным венцем украсившись, воспеваеши песнь: Аллилуия.

Икос 2

Райскую жизнь и тамо святых селение всегда во уме своем поминаючи, преподобная, в слезах и воздыханиих сердечных всю свою жизнь прешла еси. Сего ради и по смерти Христос прослави тя песньми сицевыми:

Радуйся, Манефо, светильнице солнцу подобная.

Радуйся, зеркало и образе всем православным людям.

Радуйся, пещь страстей юности угасившая воздержанием.

Радуйся, постом и бдением плоть свою сокрушившая.

Радуйся, добре преуспевшая ко приятию ангельскаго образа.

Радуйся, евангельскаго по Бозе жития ревнительнице.

Радуйся, заповедей Господних строгая исполнительнице.

Радуйся, преступающих оныя скоро обличающая.

Радуйся, преподобная мати наша Манефо, новая похвало и земли наша утверждение.

Кондак 3

От духовнаго наставника, схиигумена Макария, наставляема, послушания добрая рачительнице, преподобная Манефо, от мирскаго мятежа удалившись и инокиня бывши изрядная, добрым подвигом подвизалася еси; и ныне, вкупе со старцем твоим предстоиши у Престола Владыки Христа, воспеваеши песнь: Аллилуия.

Икос 3

Егда обеты иночества Господеву воздала еси, все твое умное желание к Богу направила еси. Мы же познавше по Бозе житие твое, прославляем Бога, укрепившаго тя, и приносим тебе таковая:

Радуйся, Духа Святаго вселение.

Радуйся, светило благочестия.
Радуйся, обители твоя присное радование.
Радуйся, преподобных украшение.
Радуйся, Богомудрая мати Манефо.
Радуйся, иночествующих славо и похвало.
Радуйся, образе терпения и незлобия.
Радуйся, преподобных сонаследнице.
Радуйся, преподобная мати наша Манефо, новая похвало и земли наша утверждение.

Кондак 4

Божественный свет осия жилище твое, преподобная, егда в час молитвы твоя Сама Пречистая Дева, пришедши к тебе со схимонахом Артемием, рече: Мне молись. Сего ради мы веруем, яко Дева Мария внемлет прошением призывающих имя святое Ея и Сыну Ея зовущих: Аллилуия.

Икос 4

Слышаще и видяще святое жилище твое, преподобная, людие устремишася вси к тебе, поучахуся о словесех твоих и подвизах, прославляху Бога и тебе величаху, зовуще ти:
Радуйся, Пречистыя Богородицы верная служительнице.
Радуйся, присно славительнице имени Ея преблагословенного.
Радуйся, яко Владычицею хранимая, греховных падений избегла еси.
Радуйся, покрову Ея себя предавшая.
Радуйся, обитель Ея яко тихое пристанище избравшая.
Радуйся, яко тамо отвергшаяся воли своя.
Радуйся, Небесе и земли Царицу лицезревшая.
Радуйся, о сем преисполнившаяся радости духовныя.
Радуйся, преподобная мати наша Манефо, новая похвало и земли наша утверждение.

Кондак 5

Воздержание, молитву и любовь стяжавши, преподобная, образ иноческаго жития явилася еси, в немже преуспети пособствуй ходатайством твоим и нам, вопиющим песнь Богу: Аллилуия.

Икос 5

Яко финикс процвете тело твое нетлением, преподобная, и, яко кедр, иже в Ливане, умножишася чудеса, приносяще благодатную помощь всем с верою приходящим. Мы же, дивящиеся таковому о тебе Божию промыслению, со умилением вопием ти:
Радуйся, исполненная Христовы красоты.
Радуйся, доме добродетелей.
Радуйся, благоутробия сокровище.
Радуйся, благочестия столпе непоколебимый.
Радуйся, храме Всесвятыя Троицы.
Радуйся, всех святых сожительнице.
Радуйся, смирения и незлобия учительнице.
Радуйся, терпения и миролюбия наставнице.
Радуйся, преподобная мати наша Манефо, новая похвало и земли наша утверждение.

Кондак 6

Услышана была еси, мати Манефо, от Бога, яко молитва твоего смирения облаки пройде. Темже молитвенныя воздыхания твоя Вышний приемля, даде убийце некоему дух прав, имже умилился, в покаяние прииде. Вси же, дивяся чуду сиевому, воспеша Богу дивную песнь: Аллилуия.

Икос 6

Дар Божий прият молитв твоих крепость, вся совершаеши, преподобная, мудре и преславно. Мы же грешнии, любовь к тебе подвигаеми, дерзаем ублажати тя сие:
Радуйся, яко чудеса Бог тя прославляет.
Радуйся, яко твоими молитвами сопротивнии побеждаются.

Радуйся, притекающим к тебе спасения ходатаице.
Радуйся, христоименитым людям похвало и утверждение.
Радуйся, добродетелей украшение.
Радуйся, сирым прибежище.
Радуйся, благочестия наставнице.
Радуйся, грешников исправительнице.
Радуйся, преподобная мати наша Манефо, новая похвало и земли наша утверждение.

Кондак 7

Преподобная мати наша Манефо, вся сущия с тобою учила еси, глаголя: чада, никтоже, в лености пребывай, достоин будущих благ, но законно zde страждущии, тамо законно увенчаются праведными венцы и воспоют Богу ангельскую песнь: Аллилуия.

Икос 7

Видяще, яко мзда твоя многа на небеси, мы вернии, житие твое земное разсмотревше, от сего научимся, колико может вера, деяньми споспешествуема. Сего ради прими, благосердая, похвалы сия:
Радуйся, приятельнице дарований.
Радуйся, ходатаице всех ко спасению.
Радуйся, скорбящим утешение.
Радуйся, исполняющая радости притекающих к тебе.
Радуйся, яко молитвою и богомыслием укрепила еси.
Радуйся, яко разум духовный прияла еси.
Радуйся, милостиву душу имущая.
Радуйся, яко нищим была еси питательница неоскудная.
Радуйся, преподобная мати наша Манефо, новая похвало и земли наша утверждение.

Кондак 8

Се воистину исполнишася словеса Господня: Кости твоя утучнеют и будут, яко вертоград напоенный, и яко источник, ему же не оскуде вода. По Господню сему словеси и ты, преподобная мати, пред Отцем Небесным прославлена еси и со всеми святыми выну зовешь Святей Троице: Аллилуия.

Икос 8

Тесным путем в житии своем шествовала еси и Небесных селений радости достигла еси, идеже предстоиши Престолу Пресвятыя Троицы, дарованьми чудес обогащаема. Мы же мысленно споследствующе ти, взываем с любовью таковая:
Радуйся, сирым и вдовицам крепкая помощнице.
Радуйся, града нашего стено неборимая.
Радуйся, всем прибегающим к тебе во благое разрешение.
Радуйся, всех кающихся с Богом примирительнице.
Радуйся, милости пучино неисчерпаемая.
Радуйся, гордости прогонительнице.
Радуйся, враждующих примиряющая.
Радуйся, совести пробуждающая.
Радуйся, преподобная мати наша Манефо, новая похвало и земли наша утверждение.

Кондак 9

Коль велико, преподобная мати, человеколюбие твое, вемы вси, ибо прежде смерти своя вся христоименитыя люди учила еси разумно жити и заповеди Господни блюсти, славу же Ему возносить, вопиюще: Аллилуия.

Икос 9

Како убо воспоем твое пресветлое житие и премногия твоя добродетели, преподобная мати наша, знамения же и чудеса, имиже вся просвещаеши, яко солнце? Того ради ныне во свете святых пребывающи, поминай творящая память твою песньми сицевыми:
Радуйся, сущим в бедах скорая помощнице.

Радуйся, обидящих строга наказательнице.
Радуйся, обидимых крепкая защитнице.
Радуйся, во успении своем нас не оставляющая.
Радуйся, тела наша безмездне врачующая.
Радуйся, души наша молитвами твоими спасающая.
Радуйся, исполнительнице неисповедимых Божиих судеб.
Радуйся, всем послужившая до последнего дне живота своего.
Радуйся, преподобная мати наша Манефо, новая похвало и земли наша утверждение.

Кондак 10

Конец болезней обрела еси, преподобная, наслаждение еже в Раи, от тесного бо пути достигла еси к пространству Царствия Божия, всемудрая, благословящи Бога песнию: Аллилуия.

Икос 10

Имуще душу милостиву, и чист помысл, и сердце бодро, веру неблаженну и любовь воистину нелицемерну, от земли преставилася еси к Небесным и с лики праведных водворяешися. Темже тя благочестно славим вси и почитаем священными песньми сицевыми:
Радуйся, всех преподобных Белорусских сподвижнице.
Радуйся, ревностию по Бозе преподобной Евфросинии подражавшая.
Радуйся, Софии Слуцкия великодушие стяжавшая.
Радуйся, Валентине Минской равночестная.
Радуйся, цвете нетления, землю Гомельскую облагоухавшая.
Радуйся, Церкви Божия украшение.
Радуйся, миру светильнице всесветлая.
Радуйся, жительнице рая Небесного.
Радуйся, преподобная мати наша Манефо, новая похвало и земли наша утверждение.

Кондак 11

Егда приидоша священницы к могиле твоей, преподобная, хотящи прияти тело твое, тогда, гроб открывше, видеша лежащая твоя мощи святолепно, и радуящиеся воспеша Богу дивную песнь: Аллилуия.

Икос 11

Добродетели твоя, яко цветы благоуханныя и яко камень драгоценный, имиже и угодила еси нетленному Царю и Владыце всех. Темже любовию поем тя и верно ублажаем, взываяще тебе сицевая:
Радуйся, яко пчела цвет добродетелей мудро изыскавшая.
Радуйся, дар прозрения стяжавшая.
Радуйся, детей молитве научающая.
Радуйся, от недуга пианства многи избавляющая.
Радуйся, пролитие дарований духовных.
Радуйся, милостиво свыше на нас призирающая.
Радуйся, терпением древнему Иову уподобившаяся.
Радуйся, святолепне скончавшаяся.
Радуйся, преподобная мати наша Манефо, новая похвало и земли наша утверждение.

Кондак 12

Мощи твоя положенныя в церкви, преподобная, благоухание испускают притекающим с верою, и память твоя веселит сердца наша. Тем, Владыце предстоящи, поминай нас, с любовию прославляющих Его ангельскою песнью: Аллилуиа.

Икос 12

Житие на земли благочестно скончавши, чистое селение Святому Духу явилася еси, преподобная, просвещающи с верою приходящая к честным мощем твоим. Тем и мы, честную твою обстоюще раку, ты прославляем песньми сицевыми:
Радуйся, сокровище многоценное от земли возсиявшее.
Радуйся, мощи твоя во благословение граду нашему давшая.

Радуйся, яко мощи сия токи чудес источают.
Радуйся, яко чудеса от них восхваляти тя благодарне подвижают.
Радуйся, яко тление не прикоснуса костем твоим.
Радуйся, имиже оздравляются богатии и убозии.
Радуйся, имиже смиренно преклоняются славнии и именитии.
Радуйся, о ней же спасаемся вси.
Радуйся, преподобная мати наша Манефо, новая похвало и земли нашае утверждение.

Кондак 13

О, преподобная мати наша Манефо, память твоя славна и успение со святыми! Нынешнее наша моление приемши, моли Всемилостиваго Бога избавити град наш от бед временных и вечных, умоли Господа в день страшнаго суда Его помиловати нас и избавити осуждения вечнаго, да сподобимся воспевати Ему песнь хвалы и благодарения: Аллилуия.

(Этот кондак читается трижды, затем икос 1 и кондак 1)

Молитва

О, преподобная мати наша Манефо, чистою душею своею в Небесных обителях в лике святых водворилася еси, на земли же с нами телесем нетленным пребываеши! Киими достойными похвалы прославим Тя или како наречем Тя? Ты бо всем сердцем возлюбила еси нас, сама же паче всех в Законе Господне день и ночь поучалася еси, желая во служении ближним добрым примером быти. Славим убо тя яко утешительницу скорбящим, врача недугующим и предстательницу у престола Божия о спасении душ во веки веков. Аминь.